



邊華泉集序

麻城李寵撰



余少時聞歷下有華泉邊公云公幼穎雋弱冠
舉進士凡四晉秩奉常仕躋大司徒文皇蔚起
時海內聞人有若大復何公崆峒李公胥與公
追還正始力振風雅三公者予悉未逮覲也何
李二公集已流布宇內世共珍矣予昔任南太

博購公集弗得慨公之集或逸也是年夏予等
遷司農郎奉使蒞東土覲公仲子因獲諦觀公
集寧弗足以償平昔願觀之私也耶何也學士
大夫搦翰抽思摹擬風騷世何紛也然褒焉刺
焉祝焉傷焉蔽之矣寧足以軒翥翰塗馳跡藝
苑終隨代汨沒云爾迺公則悟妙上乘體裁各
備蜿蜒鉤磔雄渾冲澹見心之敦厚焉精構選

思意寓辭表見心之溫柔焉撫物情之變態悲
人事之代禪吊今古之異勢感風俗之澆醇見
性之中和焉真鴻才之妙擬哲匠之真造公曷
克臻茲也先正曰樂聲淡而不傷和而不淫淡
則慾心平和則躁心釋公周旋禮樂多歷年所
優柔厭飫審音諧律茹古含今厥蓄豐矣肆吟
咏之形始可以被管絃協金石匪漫敷繁叙者

例論矣是故公師友劇切塞淵而問學裨資詎
可誣歟鼎峙何李並驅中原以鳴 昭代之盛
不於公屬而誰貸也耶公所樹以不朽將亦不
在茲也歟寵於是藝無能為後姑述平日慕公
之深暨今讀公集之故俾取正於尚友者焉爾

邊華泉集上卷

歷下邊貢庭實著

樂府

君馬黃贈祝仁甫赴長蘆

君馬黃我馬蒼兩馬相逐君馬良君馬來自函關道
我馬空山食秋草憶昔兩馬初學行長安見者神色
驚魯垞驪黃未足論衛丘駉牝虛馳名豈料長成人
少顧十年不踏天閑路逸群翻惹太僕嫌騰櫪正中
奚官怒以茲流落在風塵南走荆梁西入秦自傷萬

里汗流血誰道五花雲滿身棄置不須憐我馬君馬
亦在鹽車下疾足由來控者難驕嘶自合知音寡吁
嗟君馬天下無且向沙場閒秣芻比來司牧今伯樂
肯使君王空按圖

斷絃引

離琴掛幽壁玉軫朱絲絃美人不復來華月生秋圓
臨除拭金徽絃絕軫難續昨日白頭吟今朝斷腸曲
軫是美人繫絃是美人調人亡琴亦亡獨坐悲長宵
五言古詩

送陳文鳴

蓬人狗高義立志不苟同長嘯六合表傲睨一世中
君看今日顏不及昨日紅乘運各努力揚休樹德風
顏年儻相值跨鶴蓬萊東

送王叔武使河南便道省覲

黃河三尺雪冰厚不可解使君白馬來青雲見風采
蕭蕭梁園竹秀色遙相待鄒生與枚叟借問今安在
日暮登吹臺含情向千載

送王盛

朝辭 雙闕下暮抵三河宿古戍早鴻稀荒城寒草
綠上官山吏拜行縣村童逐冉冉松間亭何人伴幽
獨

分韻再送文熙

夜叉河漢橫春堂別燈黯風淒鳥初動露重花猶斂
明發不在茲重關為誰掩

奉贈少司徒華容王公致仕

大谷霽長霖迴雲媚山澤流潦豈不廣孰云泥吾軌
朝謝司農卿夕為岳陽客 皇眷良在茲行止各有

適有適非盤教眷言反初役解彼府中綬歸我湖上
宅葺宇依清漣躋山憇玄石幽棲謝生慮靜便終日
夕矯矯雲際鴻誰能制其翮

答石峯見懷之作

露井梧桐凋杳杳秋夜涼眷言懷美人展轉何能當
纖月掛西牖微明照我床皎皎瓊樹姿寤寐如在傍
近離已不堪况乃途路長誰其繫子馬慰我心彷徨

寄弟賦

憶爾別我時日照河邊柳痛哭別我去上馬猶回首

知爾愛我心不殊足與手徘徊望行塵佇立沙上久
榮恩介壽詩為陳矩菴中丞廼翁作
乾坤蕩無極客子日行邁永懷將父吟陟岵發潛慨
閒登楚丘望長川皓如帶高榭鳴玄蟬秋風起江介
煙中樹如薺隱隱見吳會

次東卿韻輓北村秋官

昔我師事公公以我為友長安車馬地相從十年久
如何永潛翳冥卦西山畝敢謂涕無從離離滿衣袖
喔喔鷄亂啼皎皎月在墻立馬古城下長歌盡餘觴

咄嗟霄漢姿今返冥漠鄉公昔較我藝弱冠舉于鄉
公子復青年探花冠群芳浩蕩雲中衢接羽相翱翔
思公不可見斷絕我中腸我才疎以拙應荅多後時
長懷隴頭吟負公十景詩公今卧泉壤隴樹生新枝
何意述德篇翻為斷腸詞昔公卧病居坐我釋子牀
藥物雖見親書帙猶在傍中宵激昂志江漢相與長
哀哀七尺墳漠漠春蕪荒

七言古詩

送秦用中文學

玉真臺下三間屋屋後有松前有竹廣文先生雙鬢
禿長對青藜夜深讀有時不巾亦不服獨跨瘦驢携
短僕五老峯前看秋瀑有時芒鞋步江澳月落詩成
江鬼哭石底流泉手親掬歸來煮茗窓下宿清夢遽
遽謝梁肉鳥聲墮枕猿掛木紅日三竿睡初熟食罷
曉盤歌首宿為剪溪雲封尺牘長安故人勞遠目

題豐內翰愛鳧樓

春鳧呼其侶拍拍戲芳渚一鳧忽驚人群鳧共高舉
回翔集城下點點散如雨愛鳧古人今幾秋夕陽江

上空高樓憑闌獨送千里目平沙莽莽寒煙綠

病婦行為悼功甫悼亡

妾嫁郎才十五辛苦為郎立門戶舅喪未了復姑喪
十載牛衣一環堵薦書初下郎有名寒冬携妾來
京城可憐弱質犯霜雪春花一夜成秋零左攬兒右
牽女淚濕枕花紅淒淒背燈語招魂須故衣埋骨須
故鄉郎恩豈云薄妾命自不長解錢繫兒襦留市梨
和棗拔釵穿女裳留作嫁時粧兒女勿啼郎勿哭喪
車不及泉臺轂

歸人哀為南海張進士作

歸人哀哀不極雙墓纍纍五羊側親顏歆見不可得
夢裏相看畫中憶養兒謂言得兒力晝錦歸來掃荆
棘百金置酒千金庖散作空山老鴉食歸人哀哀不
極

接樹嘆為方舉人迺翁作

朝汲水暮伐土山人接栗山中圃白頭翁嫗感且傷
那能更待渠實嘗春風花開秋結果玉盤跪進黃金
顆冰魚凍笋古有之誰道蒼蒼不關我我圃之樹今

十圍雙親何在塚纍纍山人見之雙淚垂

傳本學二親輓歌

夫荷戈妻辟纁渡江北來戍 京都京都主將多錦
腴夕幙朝衙馳復驅恨不為君西繫胡四十二載空
良圖大兒官至執金吾小兒廷評寃獄無諸孫亭亭
俱丈夫興來一飲酒百觚長歌激烈聲嗚嗚源溪冬
寒水亦枯笑將白髮歸黃壚翁生有聞翁不孤

贈張氏汝吉汝誠兄弟

魯川何迢迢太行亦蒼蒼行人躍馬出門去何異飛

鶴東西翔愛君此行飲君酒君家兄弟古未有夕郎
清迥鵬鷲姿汝吉以黃門改御史按山東秋曹盤礴雷霆手汝誠以郎
中改御史按山西朝論同歸攬轡年家聲况是埋輪後青
春衣繡下中臺山東山西花欲開休嗟翼羽經年別
早喜陽和及草萊

題程時昭所藏畫鶴圖

程侯手持雙鶴圖索我為作雙鶴篇高堂展觀羽翻
動碧落清立如眼前丹青爾何人天機入幽渺斷霞
殷殷江日曉雙鶴如人立松杪跂者自跂鳴者鳴華

亭遼邈緱山杳宛轉如思珠樹林蒼茫誰識九臯心
吳王郭裏秋塵滿漢帝壇前春草深西山玉臺不可
見東溟金竈已難尋吾想丹青人前身恐茲物華表
歸來氣紆鬱五里徘徊月中宿不然形神安彷彿程
侯程侯霄漢姿三春作郡楚江湄休令怨嘆分行去
化履升雲會有時

次韻贈陸文質歸雲間

橋西落日橋東虹碧烟黯黯秋正中九峯仙客泛槎
去鶴氅虬髯吹晚風槎頭乞藥人如市共說神方能

起死海上傳來語不虛青蛇本是龍宮子月光星影
動銀灣河鼓天孫指顧問長安亦有君平肆莫避雲
濤隔歲還

分韻得岳字送邢侍御出按秦中

函谷關頭鷄喔喔驄馬凌秋向西岳岳前石子何榮
确繡衣侍者斧在握冠上神羊城一角西抵龍荒北
幽朔百二河山眼中邈渭水清清涇水濁須君激揚
無憚數

賦得秦伯祠送龍致仁僉事

萬乘尊如浮雲髮乎可斷身可文弟有雍孫有札百
代清風見家法牲牢膾黍稷香帛烟裊簫吹揚使君
祭掃廟門掩陰風颯颯靈旗颭

送陳嘉言經畧赴陝

前年使長江南今年使長城下使君自有開濟謀不
在舟航即鞍馬馬行萬里道君抱萬里心二月春草
短雲愁沙磧陰長城路通咸秦古來轉餉多名臣後
有李唐前有漢君不見蕭何與劉晏

送馬欽湖赴湖南提學

征馬帶落日出門君已遙層城不隔夢夜度蘆溝橋
蘆溝橋邊車簇簇故人却在城南宿誰令相見轉多
情翻恨遲行不如速江漢風煙遲早春關山雨雪暗
邊塵臨岐莫動殊方感予亦東西南北人

送高南屏大叅升方伯入閩

昔我分符作荆守我公坐鎮黃河口繫馬殷王廟左
槐開筵衛女堤邊柳公今叅佐臨我邦我亦抱疴眠
芸窓溪樹陰陰白日靜干旌時到木蘭艤回思十二
年相見歲華倏忽驚流電路岐迴復餘萬程宇宙陰

晴經幾變憶公安得常見公古貌依稀魂夢中但看
邸報知遷轉那記官階卑與崇餞賓雜還喧徒御斜
月蒼涼郭門曙獨鶴孤琴一蓋飄我公遠向閩山去
人生垂翼豈有恒大舟淺水固難勝扶搖直上自此
始公不見天池六月南飛鵬

送趙華鎮之東安

趙侯別我何所適華髮遠為淮甸客鎮日相逢只獨
醒主人笑君太拘迫簿書集案山嵯峨一入官曹事
即多箇裏韶光最堪惜眼看春樹葉婆娑

壽屠左丞

異才生間世聲業播乾坤權總西臺長官登少傅尊
青雲連甲第白日映高門高門甲第開華宴白日青
雲麗芳甸縹緲鸞書海上來躡蹻鶴駁圖中見涼秋
九月天宇空紫衢合沓飄香風黃封錫命來中使
玉帶稱觴列上公上公中使分先後共指南山祝眉
壽七十遐齡古已稀三千賀客今誰有南山何物比
嶙峋雪鬢霜髯七尺身他日麒麟須畫像此時龍馬
是精神予本東州牧羊子姓名曾入山公啟執豆叨

瞻未坐光升歌敢並群仙齒明公持法法不私春陽
多在沍陰時漢廷赫赫名臣傳異代同倫張釋之

為王工部大用題菜園

采采雨間葉青青陌上春欲知疏溉力試問園中人
紛紛鍾鼎徒醉卧飽者馘不謂丹青手能傳使君意
使君有園十畝強時因採摘露沾裳短籬不許鄰鷄
入嘉味還同過客嘗後來勿斲園中土留取清風千

葉長

題貞潔卷

貞比高陵栢潔比陰壑冰緬彼考槃客相思勞寢興
至潔不可污至貞不可變兩世同一心百年能幾見
栢有後秋葉水有中夏寒貞潔苟弗渝炎雪何能干

題孔水部廷瑞雙鵲圖

峩峩中庭石傍此寒歲花離離錯錦繡五色明朝霞
雙鵲何處來相對聲喳喳似為主人報水曹 恩寵
加水曹住近荆門牌千里洪流歸彈壓疏排不數賈
讓功決淪盡遵神禹法玄圭早晚當告成 天王近
日已知名崇階峻級懸相待豈用區區靈鳥聲

題白岩竹

竹枝裊裊根卓卓質堅不受苔蘚剥是誰向壁掃縑
素古色蒼顏秋濯濯彷彿猶自煙水區萬里湘潭土
新斲又疑身坐風雨窟老蛟盤拏突頭角醉呼虞帝
歌南風蒼梧雲深翠華邈

題劉道行祖母拾禾教子冊

朝拾田中禾暮藝釜下薪止願兒力學不愁家業貧
兒生有兒先入官可隨萬里居長安 帝與封章不
肯受却待成名報吾母江風吹船南入巴阿孫奉使

兒還家拜墳呼母母不語淚濕秋山空黍花

海樵吟

海樵老翁居海島自言不及山樵好山樵伐木歸作
薪隆冬滿室回陽春海樵網得珊瑚樹竈底欲燃燃
不去日將空腹對家人敢向山樵論飽飫 中興天
子元會辰大開閭闔羅九賓 勅使四方求寶貨海
樵尚食山樵餓

四友亭詩有序

鎮江之墟有亭峙焉左松右竹前梅後柏許

氏四兄弟之所居而友之者也曰松友伯焉
竹友仲焉梅友叔焉柏友季焉是蓋齊堅並
貞異體一情者矣昔姜氏以同被為懷田家
以感荆再合薄俗敦焉古今人豈異也路遠
靡致高風難挹爰微厥好聲為四詩雖莫助
於友于要亦無乖慕想云耳

伯氏曰我所友兮在徂徠直幹矯矯排風雷千秋萬
歲倚崔嵬美人贈我雲錦青何以報之松下苓朝食
暮餌通仙靈駕青牛兮凌紫庭

仲氏曰我所友兮在淇澳苦節娟娟樂幽獨千秋萬
歲無翦牧美人贈我綠錦裾何以報之竹上茹朝食
暮餌康且癯駕青鸞兮凌紫虛

叔氏曰我所友兮在孤山繁英燦燦開冰顏千秋萬
歲倚清寒美人贈我素錦綢何以報之梅白華朝食
暮餌精神和駕青禽兮凌紫霞

季氏曰我所友兮在新甫銅柯蹇蹇霜皮古千秋萬
歲辭斤斧美人贈我翠錦裾何以報之栢子仁朝食
暮餌容色新駕青虬兮凌紫雲

題趙訓夫海屋添籌卷

海上屋幾千尺麗日起扶桑鱗鱗曙煙碧仙籌刻玉
雲花湛海塵一飛籌一點借問仙翁壽幾何十屋仙
籌克盡檻仙翁家住海中村平原公子宋王孫相逢
欲訪桑田事雙鶴何年下海門

弘治辛酉夏五月省元杜廷陳氏卧病旅邸予
往問焉至則死矣逾四年其兄廷獻會予京
師言及泣數行下且謂不可無詩以哭其弟
也追憶往事為補此篇

切切重切切秋風桂枝折哀哀復哀哀人歸長夜臺
桐為棺兮席為舍寒巷蕭條日光下孤兒五歲初學
行向人啼父不成聲訪君來哭君去鄉路迢迢隔暝
烟維水萊山渺何處

五言律

次韻春雪

恠爾陽春日淒淒晝雪寒情知飛絮假還當落梅看
向日偏縈戶隨風故繞闌同雲幕千里吟坐憶長安
分賦春雨得時字

為賦西堂雨黃昏坐不辭礎痕移榻處池漲捲簾時
瑞紀農官頌題分水部詩客車何日返真長故山芝
正月七日飲教水部分司歸即事

結榜依江岸傳觴感歲華偶同人日酒翻滯使星槎
水凍仍餘雪林寒且未花醉歸燒短燭高枕聽昏鴉
寶應元夕飲朱弁之舍

望望安平驛春行路不遙故人還此地芳序且元宵
水近湖通閣燈寒月過橋計程拚取醉佳賞更須招

望陵

邊華集 上卷
憶在先朝日曾沾侍從息 鸞輿歸寂寞 鳳質
儼生存夕日昏阡樹春風長澗繁祠官如可乞長奉
泰陵園

西陵訪王給事汝溫不遇 時汝溫督工泰陵

狂夫多野性春到每思家却訪山中客還逢水際花
薄雲陰古殿鳴鳥聚連沙迤邐回谿晚 西陵月正
斜

遊玄福宮

福地盤青甸香臺倚紺雲材分龍藏寶功就羽林軍

洞客脩丹錄山靈護敕文願資玄教力千載翊明君

泰陵供事述感

象設徒虛備 龍遊竟不還勳華留率土精爽寄空
山石錮金泉黝雲棲碧殿間 寢園如種竹應有淚
成班

下陵

窈窕山逕僻喧喧徒御歸馬逢危石住燈入古林稀
樹密全妨蓋雲寒半濕衣紅門知不遠秋角聽依微

上城

卧病長夏晚出門秋草生聊因上陵日一寄看山
情野水侵平道寒雲覆古城 聖君方用武群盜敢
縱橫

五月七日陪李劉二侍御遊宴尹亭

不到北湖久重來蓮葉青水香還落照山色自孤亭
竹隱尚書榻窓懸柱史星回舟忽已晚波上月冥冥
將赴靈巖午憇黃山店示同遊諸子

感時愁不極出野興仍高墟園當紅藥園林過碧桃

水行沙路軟雲卧石林牢更喜山翁朴忘形對爾曹

移榻次鳳山韻

卧榻忻幽賞虛廊接暝移棟雲低繞樹塔雨下通池
病間琴相得心勞硯獨知商歌激流楚惆悵北山期
汶上寄王工部舜夫

直擬湖邊會言從汶上過歲時鳴鳥變岐路轉蓬多
樹色連東嶽川流匯北河相思阻歡覲瞻望恨如何
和荅胡可泉郡伯

籍籍胡安慶新聲滿舊都詎知金馬客翻領玉麟符

退食還經史登樓即畫圖昔賢憂樂地元只在江湖
旅寓清源有懷故鄉親友次張西峰韻

雨過雙松午雲陰覆閣長柳綢迎日噀芹燕落泥香
碧水通官舍青山接故鄉懷人不可見歸思轉蒼茫

贈宋醫

施藥漳河口高齡髮未華地疑京兆市人即宋清家
石壁垂金草丹爐起玉花願傳玄牝訣交臂入青霞

送都玄敬

驅馬別君處秋陰當暮生林柯無靜葉江鴈有歸聲

綠水閭門道青山建業城未能同理楫延佇獨含情

次東卿韻送曹元孝監河之徐州

水部移舟楫臨津問所須離心漢宮柳幽夢楚垓蕪
鴈迥雲重覆花寒地一隅吟詩坐東閣誰與監冰壺

贈別

早葉乍辭林晚蟬初罷吟入秋鄉國夢垂老故人心
道在寧須祿官清尚有琴城隅分手處惆悵水雲深

送孫志同經畧居庸

寶劍青驄馬秋高出塞行田公新受律武子舊傳兵

鼓角遶雲憐旌旗海日明穹廬莫南徙中國有長城
送王載卿

萬里雲霄使三秋澤國船冰霜消嶺瘴旌蓋麗江烟
國賦徵求裏民風奏記前獨憐詩社冷一別又經年
送王君寵主潼津驛

潼津佳勝地驛舍近潼關立馬看河水開窓對華山
客懷登覽際官守送迎間倘見三秦友傳予髮已班
送李司務思善

可恠皇華使相逢九日過地偏秋鴈少天迥暮雲多
北渚青簾舫南山白玉珂未能同一醉離別思如何
送徐德章乃翁

春看燕市花秋返晉陵槎水樹侵沙濶江村隱驛斜
夢依南國近書寄北關賒坐惜薇郎苦遙心附海霞
次韻留別王生

天際陰風起浮雲似馬行飛揚亦何意離別祇關情
古岸垂楊合長河暮色清何時畫舸背樽酒說平生
送王演之

驅車度宛洛歸路及春深杳杳還家夢悠悠去國心

青山臨古渡白日下豐林憔悴逢漁父應為澤畔吟
別伯玉

君行不相見卧病對春風世事浮沉外交親感慨中
古臺燕郭暮流水晉祠空他日歌招隱青山有桂叢
送陶良伯使魯府

天馬玉花驄騎來天廐中言經汶陽道却過魯王宮
岱嶽浮雲外蓬萊碧海東飄飄鸞鶴侶仙駕與誰同
送張廣漢中丞觀軍留都二首

聞說狼山下江波帶血流中原初息戰諸將各封侯
草綠西興渡雲生北固樓經過吊陳迹春日暫停舟
其二

二月金陵道中丞擁節還日光搖組甲春色映江關
國壯軍容整時平武畧閑坐看龍虎氣長繞鳳凰山
送韓石泉赴德州充運

細雨空城暮游雲散薄陰落花春晚色芳草病餘心
夢接官曹近愁生國計深林中與水次誰伴獨行
吟

次韻留別張西盤大叅

苦戀三秋別還為十日留江湖宋玉感風雨杜陵愁
墮葉鳴沙岸寒雲抱驛樓河梁阻携手誰與賦同舟
送程給事廷獻冊封周世子還朝兼赴昌

邑省觀

冊命臨中土恩華接上台雪明朱閣麗風引翠簾
開漢使鳴環入王孫露冕來星槎曙嫋嫋欣傍早春
廻

卧疾東別孫性甫

杳杳關河客盈盈一水間那因各抱病遂阻共開顏

雨入青簾細雲移碧樹間含情送遙矚時見暝鴉還

張秋官元德席上留別

春日江陵去烟花萬里途山川留故郢舟楫帶三吳
樹影湘流轉猿聲峽月孤郡樓登望夕天北是皇
都

昌平館

寒食煙花暮傷歸復旅遊芳尊不相對華館坐悠悠
月細光疑晦山空響似秋老親垂短髮計日向西州
李月輝方丈

雞犬不聞音仙家巷陌深洞簫吹赤玉丹竈化黃金
庭迥秋花寂堦寒夕雨沉願傳方外秘勿使歲華侵
雨中憇雙泉寺

野寺臨官路山門俯近郊閣虛鍾梵寂院靜薜蘿交
密雨沉蛛網閒雲擁鶴巢故人詩在壁惆悵隔衡茅

九日登千佛山寺

窈窈寺門敞蒼蒼山徑微風輕不落帽雲近忽凝衣
刺嶺丹楓直垂岩紫菊肥晚途喧葆吹輿醉出林霏

壽文孔賜

壽域開梁苑韶華逼艷辰月臨春館靜花簇夜筵新
鶴信傳西母鸞簫樂上賓轉憐多病客高枕獨懷人

楊介夫喪母

楚客抱沉哀孤舟天際回恩餘五鼎食人閉九泉臺
古壁機絲斷殘燈總帳開慈魂猶戀子夜夜夢中來
對月感懷

惆悵東籬下西風酒一壺物隨秋漸老人與月同孤
幻夢疑蕉鹿塵踪咲網蛛寒蛩不解意唧唧向青蕪
龍洞山雜咏

出郭始朝飯入山聞暝鍾自憐衰病久敢恨僕夫慵
立馬看群岫開尊對兩松誰能回白日延眺且從容
過北渚庄

渚老有高趣未衰先棄官心猶壯夫勇身且布衣寒
雪裏中宵坐燈前細字看不知東海上何日起垂竿

題白泉王子壁

吟興復不淺村中無酒家圃雲深映竹墟日半籠花
石柵啼黃鳥溪泉擁白沙晝眠兼夕坐非為惜年華
過湘王故宫

舊日湘王府淒涼百歲多堞荒秋薺上樓敞夕雲過
廢園穿狐兔深宮散綺羅同行有詞客閑詠黍離歌
自峴山趨赴襄城不及門遂宿漢江驛

黃昏峴山曲征馬倦躋攀雨過蒼林外虫鳴廢井間
斷崖成聚落深巷隔塵寰古驛懸燈候重門未上關
登仲宣樓次韻陳矩菴中丞

岩岩南郡樓到郡此重遊島沒雲中樹天浮海上漚
旌旗連戍色鼓角動邊愁萬里看西北蒼茫見帝
州

贈劉介夫舉人歸金鄉限韻作

雲日晝冥冥幽人過草亭
客衣寒映水歸騎晚侵星
兩外山逾秀霜前柳尚青
醉翁多宴起行李暫須停

寄弟賦

弱弟復多病相思傷我神
爾須為孝子吾已愧忠臣
膝下三春夢湖南萬里身
晨昏甘旨暇休對說烽塵

